



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» br. 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» br. 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2019. GODINU **LIBERALNE STRANKE BOSNE I HERCEGOVINE**

Broj: 03-07-6-332/20
Sarajevo, 24.08.2021. godine

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE	5
5.1 NALAZI	5
5.2 PREPORUKE	9

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Liberalne stranke Bosne i Hercegovine za 2019. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2019. godinu, utvrđeno je da je Liberalna stranka Bosne i Hercegovine prekršila odredbe člana 4. stav (1), člana 8. stav (1), člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Liberalne stranke Bosne i Hercegovine za 2019. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Liberalna stranka Bosne i Hercegovine finansirala se iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica (3-a)	0,00	0,00
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	0,00	0,00
7.	Prihodi iz budžeta (3-f)	115.798,12	95,78
8.	Prihodi od propagande (3-g)	0,00	0,00
I	Ukupni prihodi (1-8)	115.798,12	95,78
II	Ostali prihodi i drugo	5.100,00	4,22
	Izvori finansiranja (I+II)	120.898,12	100,00

U godišnjem finansijskom izvještaju stranka je iskazala rashode u ukupnom iznosu od 136.867,18 KM.

2. PREDSTAVLJANJE POLITIČKE STRANKE

Naziv političke stranke je Liberalna stranka Bosne i Hercegovine. Skraćeni naziv stranke je LS BiH.

Liberalna stranka Bosne i Hercegovine registrovana je kod Općinskog suda u Goraždu, rješenjem broj: 045-0.F1-13-000 002 od 23.12.2013. godine.

Sjedište političke stranke je u Goraždu, ulica Seada Sofovića Sofe bb.

Lica ovlaštena za zastupanje stranke su Daliborka Milović, predsjednica stranke i Slobodan Janković, podpredsjednik stranke.

Lice ovlašteno za podnošenje finansijskih izvještaja za 2019. godinu je Dino Vektor d.o.o..

Prema podacima iz godišnjeg finansijskog izvještaja za 2019. godinu, organizacionu strukturu Liberalne stranke Bosne i Hercegovine čine:

- Glavni odbor LS BiH,
- Kantonalni odbor Goražde i
- 2 opštinska odbora.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Liberalne stranke Bosne i Hercegovine za 2019. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Liberalne stranke Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju je izvršila pregled i reviziju finansijskih izvještaja Liberalne stranke Bosne i Hercegovine u periodu od 2014. do 2018. godine, nakon kojih su izdati izvještaji o pregledu sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja Liberalne stranke Bosne i Hercegovine za 2018. godinu, izdat je izvještaj o pregledu sa mišljenjem revizora, nalazima i preporukama stranci da finansijska sredstva obezbijeđena za finansiranje stranke koristi u skladu sa utvrđenim programom utroška sredstava, da se ne finansira iz izvora koji su Zakonom zabranjeni, da poslovne knjige vodi u skladu sa računovodstvenim propisima, odnosno da uspostavi tačne evidencije o prihodima i rashodima stranke, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka, da otvori poseban računa za finansiranje kampanje i da, imajući u vidu strukturu troškova stranke i činjenicu da se finansira isključivo iz budžeta, racionalnije troši finansijska sredstva.

Nerealizovane preporuke:

Na osnovu uočenih nedostataka u godišnjem finansijskom izvještaju za 2019. godinu, utvrđeno je da Liberalna stranka Bosne i Hercegovine nije ispoštovala sve preporuke.

5. NALAZI I PREPORUKE

5.1 NALAZI

a) Liberalna stranka Bosne i Hercegovine prekršila je odredbe člana 4. stav (1) Zakona o finansiranju političkih stranaka.

U godišnjem finansijskom izvještaju stranka je iskazala rashode u ukupnom iznosu od 136.867,18 KM. Stranka je dostavila Program utroška sredstava za 2019. godinu u kojem je predvidjela ukupne troškove u iznosu od 155.000,00 KM.

Analizom Programa utroška sredstava za 2019. godinu utvrđeno je da isti nije sačinjen na način kojim bi se obezbijedila potpuna transparentnost planiranog trošenja sredstava, kao i njegova uporedba sa ostvarenim troškovima, te da stranka sredstva nije utrošila u skladu sa planom troškova za 2019. godinu, čime je prekršila odredbe člana 4. stav (1) Zakona o finansiranju političkih stranaka.

- (1) Pregledom finansijskog izvještaja i finansijske dokumentacije stranke utvrđeno je da politička stranka nije planirala troškove zakupa poslovnih prostorija, troškove stručnog usavršavanja i troškove poreza i doprinosa.

Stranka je u 2019. godini navedene troškove ostvarila u ukupnom iznosu od 4.412,36 KM, i to: troškove zakupa poslovnih prostorija u iznosu od 365,04 KM, troškove stručnog usavršavanja u iznosu od 1.000,00 KM i troškove poreza i doprinosa u iznosu od 3.047,32 KM.

Takođe, utvrđeno je da je stranka prekoračila planirane troškove, kako slijedi:

- Stranka je troškove ugovora o djelu planirala u iznosu od 20.000,00 KM, dok je iste ostvarila u iznosu od 24.601,11 KM, što je za 4.601,11 KM više u odnosu na plan.

Stranka je u obrascu 4.1 (režijsko-administrativni i ostali troškovi) troškove ugovora o djelu u iznosu od 5.703,32 KM iskazala u okviru troškova usluga, dok je troškove u iznosu od 18.402,79 KM iskazala kao ostale nematerijalne troškove.

- Liberalna stranka Bosne i Hercegovine je humanitarne rashode planirala u iznosu od 20.000,00 KM, dok je iste ostvarila u iznosu od 25.948,69 KM, što je za 5.948,69 KM više u odnosu na plan.

Stranka je u obrascu 4.1 (režijsko-administrativni i ostali troškovi) humanitarne rashode i donacije fizičkim licima iskazala u ukupnom iznosu od 19.639,69 KM, dok je troškove pomoći povratnicima i domicilnom stanovništvu za sanaciju putne komunikacije u iznosu od 6.309,00 KM iskazala kao troškove usluga.

Uvidom u dostavljenu dokumentaciju, utvrđeno je da je predsjednica stranke Odlukom broj: 06-2-1-B-4-2/19 od 05.04.2019. godine odobrila sredstva za sanaciju putne komunikacije u iznosu od 7.000,00 KM, te da je u tu svrhu utrošeno 6.309,00 KM. Prema podacima sa računa broj: 03/19 od 30.04.2019. godine koji je ispostavila TR „Dragana“ S.P. Veliborka Šubara, utvrđeno je da je račun ispostavljen za usluge utovara, transporta, nasipanja i valjanja tampona na putnoj komunikaciji Lug-Biljin u dužini od 5 km, te da je vrijednost usluge iznosila 6.309,00 KM.

- (2) Planom utroška sredstva stranka je planirala *Troškove goriva i maziva* u iznosu od 20.000,00 KM, dok je za tu namjenu utrošila sredstva u iznosu od 29.978,87 KM.

Uvidom u dostavljenu dokumentaciju, račune za isporučeno gorivo, utvrđeno je da je dobavljač TZS „Oil“ d.o.o. Vitkovići stranci mjesečno ispostavljao fakture za isporučeno gorivo (dizel i BMB)¹, te druge robe (metlice brisača, motorno ulje i dr.) u iznosima od 949,37 KM do 3.281,55 KM.

Imajući u vidu da stranka nije dostavila specifikacije o izdatom gorivu koje uobičajeno sadrže podatke o vozilu, odnosno registarskoj oznaci vozila kojem je izdato gorivo, te da nije dostavila naloge za službena putovanja niti putne naloge iz kojih bi se utvrdila relacija putovanja i pređena kilometraža, kao i činjenicu da prema podacima iz poslovnih knjiga stranka u svom vlasništvu nema putničko motorno vozilo, nije moguće utvrditi u koju svrhu je utrošeno gorivo, tj. u koju svrhu su utrošena finansijska sredstva stranke.

- (3) Uvidom u račun dobavljača „FBM KOMERC“ d.o.o. Goražde broj: PVC-28/19 od 16.07.2019. godine, utvrđeno je da je stranka od ovog dobavljača izvršila nabavku AL-U ograde u iznosu od 1.300,07 KM, a da pri tome nema nekretnine u svom vlasništvu i koristi zakupljeni poslovni prostor čiji je vlasnik Grad Goražde.

Takođe, stranka je u poslovnim knjigama evidentirala i troškove građevinskog materijala za fasade i krečenje, materijal za vodovodne i elektro instalacije po računima pravnog lica „Unigradnja“ d.o.o. Goražde iz 2018. godine u ukupnom iznosu od 4.520,52 KM.

¹ Isporučeno je gorivo u količinama od 434 litara do 1.476 litara mjesečno.

b) Stranka je prekršila odredbe člana 8. stav (1) Zakona o finansiranju političkih stranaka.

Liberalna stranka Bosne i Hercegovine je primila novčana sredstva od Federalnog zavoda za zapošljavanje Sarajevo u iznosu od 5.100,00 KM, čime je prekršila odredbe člana 8. stav (1) tačka b) Zakona o finansiranju političkih stranaka.

Stranka je u toku 2019. godine primila novčana sredstva od Federalnog zavoda za zapošljavanje Sarajevo po osnovu Ugovora o sufinansiranju zapošljavanja-Periodično/sezonsko zapošljavanje 2018. godine u ukupnom iznosu od 1.320,00 KM, a po osnovu Ugovora o sufinansiranju zapošljavanja-Periodično/sezonsko zapošljavanje 2019. godine sredstva u ukupnom iznosu od 3.780,00 KM.

Suprotno odredbama Zakona o finansiranju političkih stranaka, stranka je primila finansijska sredstva od javne institucije, odnosno finansirala se iz izvora koji je zabranjen Zakonom.

c) Politička stranka prekršila je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu obavljenog pregleda godišnjeg finansijskog izvještaja i dodatne finansijske dokumentacije, utvrđeno je da Liberalna stranka Bosne i Hercegovine nije uspostavila tačne i pravilne evidencije o rashodima i obavezama i nije pravilno popunila obrasce godišnjeg finansijskog izvještaja, čime je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka i odredbe Pravilnika o godišnjim finansijskim izvještajima političkih stranaka (u daljem tekstu: Pravilnik).

Takođe, utvrđeno je da stranka troškove ne evidentira u momentu nastanka troška, te da računi koji su knjigovodstvene isprave o nastalim poslovnim događajima² nisu ovjereni i odobreni za knjiženje i plaćanje, što je suprotno računovodstvenim propisima i praksi.

(1) Stranka je finansijska sredstva u iznosu od 5.100,00 KM koja je primila od Federalnog zavoda za zapošljavanje Sarajevo iskazala kao ostale prihode, čime je prekršila odredbe člana 13. i 15. Pravilnika.

(2) Pregledom godišnjeg finansijskog izvještaja, poslovnih knjiga i dodatne dokumentacije, utvrđeno je da stranka nije uspostavila pravilne evidencije o rashodima stranke, te ih nije pravilno iskazala u godišnjem finansijskom izvještaju, čime je prekršila odredbe člana 21, 22. i 23. Pravilnika.

- Uvidom u analitičke kartice troškova, utvrđeno je da je stranka u poslovnim knjigama za 2019. godinu evidentirala i dio troškova po računima iz ranijih godina, što ukazuje da poslovne knjige ne vodi u skladu sa računovodstvenim propisima.

1. Stranka je u poslovnim knjigama evidentirala troškove građevinskog materijala za fasade i krečenje, materijal za vodovodne i elektro instalacije po računima pravnog lica „Unigradnja“ d.o.o. Goražde iz 2018. godine u ukupnom iznosu od 4.520,52 KM.

2. U obrascu 4.2 (troškovi propagande) stranka je iskazala i troškove predizbornog oglašavanja po računu pravnog lica „Inžinjering“ d.o.o. Goražde broj: 61/018 od 24.09.2018. godine u iznosu od 819,00 KM. Stranka je ovaj račun platila u toku 2019. godine.

² U skladu sa računovodstvenim propisima, sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.

- Kontrolom poslovnih knjiga utvrđeno je da je stranka izvršila isplatu sredstava fizičkim licima po osnovu ugovora, ali je navedene troškove u obrascu 4.1 (režijsko-administrativni i ostali rashodi) iskazala kao troškove usluga u iznosu od 5.703,32 KM, odnosno ostale nematerijalne troškove u iznosu od 18.402,79 KM. Stranka je u poslovnim knjigama troškove po ugovorima trebala iskazati kao troškove ugovora o djelu, te iskazati u godišnjem finansijskom izvještaju.

Isto tako, stranka je troškove poreza i doprinosa na isplaćena sredstva iskazala kao ostale nematerijalne troškove, čime je prekršila odredbe člana 22. Pravilnika.

- U godišnjem finansijskom izvještaju, u obrascu 4.1 (režijsko-administrativni i ostali troškovi) stranka je iskazala troškove usluga u ukupnom iznosu od 12.405,72 KM. Kontrolom podataka koji su iskazani u obrascu 4.1 utvrđeno je da je stranka u okviru troškova usluga iskazala humanitarne troškove u iznosu 6.309,00 KM.

Kao što je već i navedeno u nalazi pod a), predsjednica stranke je donijela Odluku broj: 06-2-1-B-4-2/19 od 05.04.2019. godine kojom je odobrila sredstva za sanaciju putne komunikacije, te je u tu svrhu izdvojeno 6.309,00 KM. Uvidom u račun broj: 03/19 od 30.04.2019. godine koji je ispostavila TR „Dragana“ S.P. Veliborka Šubara, utvrđeno je da je račun ispostavljen za usluge utovara, transporta, nasipanja i valjanja tampona na putnoj komunikaciji Lug-Biljin u dužini od 5 km, te da je vrijednost usluge iznosila 6.309,00 KM. Takođe je utvrđeno da račun nije ovjeren i odobren za knjiženje i plaćanje.

Imajući u vidu Odluku predsjednice stranke, stranka je u poslovnim knjigama i finansijskom izvještaju troškove po navedenom računu trebala iskazati kao humanitarne troškove.

- Stranka je u toku 2019. godine izvršila isplatu sredstava fizičkom licu Daliborki Milović, predsjednici stranke, u ukupnom iznosu od 15.000,00 KM. Na zahtjev da dostavi ugovor na osnovu kojeg su izvršene isplate ovom fizičkom licu, stranka je dostavila Ugovor broj: 02-2-1/19 od 04.01.2019. godini zaključen između stranke i Eldine Milović, koji je potpisala Daliborka Milović kao radnik. Uvidom u dostavljeni ugovor i poslovne knjige utvrđeno je da je stranka evidentirala isplate Daliborki Milović, kao i da je ugovor sklopljen između ostalog, za obavljanje poslova za predstavljanje i zastupanje stranke, što su poslovi predsjednika stranke.

Gore navedeno ukazuje da dokumentacija na osnovu koje su izvršene isplate fizičkom licu nije ispravna, tj. navedeni ugovor ne pokazuje nedvojbeno i vjerodostojno karakter poslovne promjene u knjigovodstveno-tehničkom smislu, kao ni tehnička obilježja (podatke o licu sa kojim je sklopljen ugovor).

- (3) Kontrolom godišnjeg finansijskog izvještaja Liberalne stranke Bosne i Hercegovine za 2019. godinu, utvrđeno da nije dostavljen odštampan obrazac 5 (obaveze) godišnjeg finansijskog izvještaja u PDF formatu iz aplikacije FI CIK BiH, kao i da isti nije popunjen na pravilan način, što je suprotno odredbama člana 3. i člana 24. Pravilnika.

-Stranka je u obrascu 5 finansijskog izvještaja iskazala obaveze prema dobavljačima u ukupnom iznosu od 14.076,80 KM, bez navođenja podataka o svakom dobavljaču pojedinačno.

Uvidom u poslovne knjige, utvrđeno je da stranka ima neizmirene obaveze prema sljedećim dobavljačima: „Gradac“ d.o.o. Goražde u iznosu od 1.487,25 KM, „Faceart“ d.o.o. Goražde u iznosu od 447,51 KM, „Lelo“ d.o.o. u iznosu od 1.860,00 KM, „BH Telekom“ d.d. u iznosu od 658,29 KM, Centar za kulturu Goražde u iznosu od 234,00 KM, „TZS Oil“ Goražde u iznosu od 6.869,16 KM i „Novogradnja“ d.o.o. Goražde u iznosu od 2.520,52 KM.

U skladu sa članom 24. Pravilnika stranka je imala obavezu da u obrascu 5.2 finansijskog izvještaja navede sljedeće podatke: naziv dobavljača, datum nastanka obaveze i iznos obaveze prema svakom dobavljaču pojedinačno.

-U poslovnim knjigama stranke utvrđeno je da je stranka u 2019. godini iskazala potraživanja po osnovu datih avansa dobavljaču „Mesara Bratić“ u iznosu od 1.325,00 KM.

S obzirom da stranka u svojim poslovnim knjigama iskazuje avanse, evidentno je da stranka ne iskazuje sve svoje troškove, odnosno da nema tačne evidencije o svojim troškovima³.

Pored navedenog, ističemo da stranka ima potraživanja po osnovu pozajmica datih fizičkim i pravnom licu u ukupnom iznosu od 51.000,00 KM.

Uvidom u dostavljene ugovore o pozajmicama, utvrđeno je da je stranka u toku 2015. i 2016. godine dala pozajmice jednom pravnom licu i tri fizička lica, u ukupnom iznosu od 51.000,00 KM. Na dva ugovora nije naveden rok za vraćanje pozajmice, već je navedeno da će iste biti vraćene. Na trećem ugovoru je navedeno da je rok za vraćanje pozajmice 36 mjeseci, tj. 11.04.2019. godine, dok je na četvrtom navedeno da je rok za vraćanje pozajmice 31.12.2015. godine. Ni jedna od navedenih pozajmica nije vraćena stranci.

5.2 PREPORUKE

Preporučuje se Liberalnoj stranci Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da finansijska sredstva obezbijedena za finansiranje stranke koristi u skladu sa utvrđenim programom utroška sredstava,*
- *da se ne finansira iz izvora koji su zabranjeni,*
- *da uspostavi tačne i pravilne evidencije o rashodima i obavezama, odnosno da poslovne knjige vodi u skladu sa računovodstvenim propisima,*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i*
- *da, imajući u vidu strukturu troškova stranke i činjenicu da se finansira isključivo iz budžeta, racionalnije troši finansijska sredstva.*

KOMENTAR:

U ostavljenom roku, Liberalna stranka Bosne i Hercegovine nije se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2019. godinu.

Šef Odsjeka za revizijske poslove, revizor

Sanja Tošović

Šef Službe za reviziju

Mr.sc Hasida Gušić

³ Na analitičkoj kartici dobavljača „Mesara Bratić“ je navedeno da je izvršen prenos salda na potraživanje jer stranka nema račune.